



## INTRODUCZIUN

DA SER JAN-ANDREA BERNHARD

*Gest ei la fiasta dils treis sogns retgs festivada, ed igl ei gia la fiasta dil batten da Jesus avon esch e nus sedumandain: Daco ei igl evangeli dad oz il batten da Jesus? ... ah, clar: Cuort suenter la naschientscha ston ins battegiar igl affon! Denton ... ei gie Jesus vegnius battegius pér cun varga 30 onns. Gest igl evangeli dad oz dat avis a nus sin dus treis aspects buca nunimpurtonts en connex cun il batten.*

*Cheu vegn Jesus numnaus l'emprema ga (el pli vegl evangeli che nus vein) «Ti eis miu Fegl carezau!» – Ha nies bien Diu buca clamau era nus (a caschun dil batten) schend «Ti eis feglia carezada, ti eis fegl carezau?» e fundau ina ligia cun mintgin da nus? E quei independent dil termin dil batten – seigi ei stau cuort suenter naschientscha ni in dus onns pli tard.*

*Era ils plaids da Gion Battesta gidan vinavon nus, numnadamein che nus restien mudests e seigien buca garmadis: Il Spert sogn schai buca els mauns da Gion Battesta, buca en nos mauns e buca en quels dils superiurs ecclesiastics, mobein els mauns da Deus e Niessegner – entras lez «suffla el, nua ch'el vul» (Gn 3,8).*

## EVANGELI

*Mc 1,7–11*

<sup>7</sup>Suenter mei vegn in ch'ei pli pussents che jeu; jeu sun buca vengonzs da sestorscher avon ses peis e snuar las curegias da ses calzers. <sup>8</sup>Jeu hai battegiu vus cun aua, mo el vegn a battegiar vus cun il Spert sogn.

<sup>9</sup>Lezs dis eis ei capitau che Jesus ei vegnius da Nazaret en Galilea ed ei seschus battegiar da Gion el Jordan. <sup>10</sup>E gest cura ch'el ei vegnius ord l'aua, ha el viu co il tschiel ei s'aviarts ed il Spert ei descendius sco ina columba sur dad el; <sup>11</sup>ed ina vusch ha tunau giu da tschiel: Ti eis miu Fegl carezau, da tei hai jeu miu cumplascher.